

Profitaders che nus essan

DA BERNARD CATHOMAS

■ **L'emprim dal tut profitain nus da noss antenats e da l'amur da noss geniturs. Quels dattan a nus la vita, lur gens èn nossa basa da partenza.** Alura profitain nus da nossas scolastas e noss scolasts, dad amis ed amias che gidan nus a crescer, da partenarias e partenaris ch'han gugent nus, da superiurs che sfidan, dad experientschas che furman, dals vischins ch'acceptan nus. Nus profitain da la fierà da lavur che lubescha a mintgin da chattar ina plazza, paun e gudogn. Da la polizia che procura per urden e da las dretgiras che guardan che mintgin vegn tar ses dretg. Sa chapescha er da la baselgia che stat en per ils diesch cumandaments, dal stadi che dat stipen-

dis als giuvens, rentas als vegls, contribuziuns per in pau dal tut, incumbensas da construir vias, che fa leschas e guarda che quellas vegnan resguardadas.

Nus profitain da las medias che furneschan ils facts per far in'opiniun, dad RTR e da La Quotidiana che dattan a nus ina vusch, da las bancas e lur credits, da las chasas da vegls, da las vischnancas. E tgi na ha gia profità ina giada dal docter? Dad in'assicuranza? Dad in'acziun da vendita?

Quai ch'ins emblida magari: Ins profitescha er da la critica e da terradas e sconfittas, probabel schizunt dapli che dals success e da laudavaglias. E betg il davos profitesch'ins dals sbagls ch'ins fa e dals adversaris ed inimis. Quels fan ch'ins vegn pli attent e precaut. Interessant er:

Pli savens che quai ch'ins crai vegni avant ch'insatge che para il mument grev e fatal sa mussa onns pli tard sco fortuna.

Mo quels, dals quals nus profitain, profiteschan per regola er da nus: Ils amis da nossa attaschadadad, las assicuranzas da nossas premias, il stadi da nossas taglias, las bancas dals tschains, las medias da quai che nus pajain persuerter, ils adversaris da nossa resistenza.

La cuminanza umana sco societad da profitaders? Donn mo che betg tuts profiteschan tuttina, che bain inqualin dat dapli che quai ch'el retschaiva – e ch'i dat er quels che profiteschan senza merit u schizunt per donn dad auters. E quels ch'han il sentiment da perder adina.

L'autur è pensiunà activ